

甯陵縣志

甯陵縣志卷之九

人物志

三代而下豈必誠全德者各率其性之所近要亦皎然不欺其志容可沒乎究所以能自成就與所以能自樹立亦當世得失之林也子輿氏稱巨惠之風足以興起百世下之人倘親炙尤有過焉者乃就其地表其人卽未及親炙苟有聞焉將必曰吾鄉有若是人者其芳名懿行相傳至今不朽吾何獨謝不敏耶作人物志名賢

以下二十五人俱崇祀鄉賢故提冠於前

漢田王孫文帝時人初受易於丁寬遂精其業授五經博士沛郡施讎蘭陵孟喜瑯琊梁邱賀皆游其門讎尤慕之自束髮師事王孫數十年喜好自稱譽得易家候陰陽災變書詐言師田生且死時枕喜膝獨傳喜諸儒以

甯陵縣志

卷之九 人物

此耀之梁邱賀曰田生絕於施讎手中時喜歸東海安得此事甘露中有荐喜爲博士者上以其改田王孫易說以自炫售遂不用其見推重於時如此輯漢書

葛龔字元甫和帝時以善文記知名性慷慨壯烈勇力過人安帝永初中舉孝廉爲太官丞上便宜四事拜蕩陰令辟太尉府病不就後州舉茂才爲臨汾令居二縣皆有聲績著文賦碑誄書記凡二十篇

張遷字公方聰慧多才藝以郡吏數爲從事藉藉著能名除穀城長勤勸課恤罪人貴高年其下化之道不拾遺黃巾之亂攻略徧中原遷捍衛有方穀城獨完中平三年以功拜蕩陰令吏民空邑送之依依不能去因碑其政以繫遺思云

夏侯訢字長况母疾屢經危困訢衣不釋帶者二年母憐其辛苦令出使寢息訢方假寐忽夢其父語之曰汝母疾疣痼非凡藥可愈天帝矜汝至

孝錫以仙藥在居屋後桑枝上訢忽驚起如所言得藥進之母病頓瘥永樂御製有曰母有疾而致其憂孝子之心也至於感格神明賜以藥物而母病得愈者由其一念之至誠焉夏侯訢母之寢疾也瀕於危殆者數矣訢侍湯藥未嘗輒離左右至於二年之久衣不解帶蓋其憂之之深也其母見其辛苦諭使出便寢息非其情之可矜與旣而夢父語以賜藥之故其事甚異夫藥非從桑出也天也父不易格也神明假之以相告也此訢之精誠潛孚夢寐所以得其藥與母服之卒使累歲痼疾一旦遂愈是豈偶然哉嗚呼若訢之孝感信非他人之可及也

唐劉思立高宗時爲名御史於時河南北大旱詔選御史中丞崔謐等分道賑贍思立建言蠶務未畢而遣使巡撫所至不能無勞餞又賑給須立簿最稽出入往返停滯妨廢且廣若驛處馬須預集以一馬勞數家今農事待雨與作輟日役破歲計本欲安存更煩擾之望且責州縣給貸須秋遣

## 甯陵縣志

卷之九 人物

二

使使詔聽罷謐等行遷考功員外郎始議加明經帖進士雜文自思立始見唐書

劉憲字元度思立之子擢進士調河南尉累進左臺監察御史天授中奉詔按來俊臣罪憲疾其酷欲痛繩之反爲所搆貶潁水令俊臣死召爲給事轉中書舍人坐善張易之出爲渝州刺史神龍中除太僕少卿修國史兼修文館學士景雲初三遷太子詹事時玄宗在東宮雅意墳史憲啟曰殿下位副君有絕人之才非以尋章摘句要通大意而已侍讀褚無量經明行修耆年宿望宜數召問以察其言太子順納會卒贈兗州都督有集三十帙

見唐書

代五

劉熙古字義淳唐左僕射仁軌十一世孫祖寶進嘗爲汝陰令熙古年十五通易詩書十九通春秋子史避祖諱不舉進士後唐長興以三傳舉時翰林學士和凝掌貢舉熙古獻春秋極論二篇演論三篇凝甚嘉賞召與

進士試擢第遂館於門下清泰中驍將孫鐸以戰勝授金州防禦使表熙古爲從事晉天福初鐸移汝州又辟以隨熙古善騎射一日有鶚集戟門槐樹高八尺鐸惡之投以瓦石不去熙古引弓一發貫鶚於樹鐸喜令毋拔矢以旌其能後二歲鐸卒仕漢爲盧氏令周廣順中改亳州防禦推官歷澶州支使秦鳳平以爲泰州觀察判官宋太祖領州爲節度判官卽位召爲左右諫議大夫轉兵部侍郎徙知成都府六年就拜端明殿學士丁母憂開寶五年詔以本官參知政事選名馬銀鞍以賜歲餘以足疾求解拜戶部尙書致仕九年卒年七十四贈右僕射熙古兼通陰陽象緯之術作六壬釋卦序例一卷性淳謹雖貴顯不改寒素歷官十八登朝三十餘年未嘗有過嘗集古今事迹爲歷代紀要頗精小學作切韻拾玉二篇子蒙正蒙叟

見五代史

宋劉蒙正字頤正善騎射乾德中以父熙古廕補殿直遷供奉官王師征江

## 甯陵縣志

卷之九 人物

三

南命乘傳軍中事承事盧絳以舟師來援潤州蒙正白部署丁德裕請分精甲百人出與絳戰矢中左脅戰愈力及下潤州獲知州劉澄監軍崔亮部送闕下嶺南陸運香藥入京詔蒙正往規畫蒙正請自廣韶江泝流至南雄由大庾嶺步運至南安軍凡三 舖給卒三十人復由水路輸送及掌朝服法物庫會重製繡衣鹵簿多其規式太平興國四年轉內藏庫副使進崇義使創內藏庫卽詔蒙正典領凡二十餘年眞宗初改如京使出知滄冀磁三州戎人犯境蒙正調丁男乘城固守有勞未幾以擅乘驛馬責授亳州團練副使咸平四年卒年七十二

劉蒙叟字道民乾德中狀元及第歷岳宿二州推官以所知論薦授太子中允知乾興拜監察御史徙知濟州俄以秦王子德恭判州事就命爲通判郡事皆決於蒙叟遷右補闕轉起居舍人戶部鹽鐵判官再遷屯田郎中歷知廬濠滁汝四州遷都官咸平中上疏曰陛下已周諒陰方勤萬務

望崇儉德守前規無自矜能無作奢縱厚三軍之賜輕萬姓之徭使化育被於生靈聲教加於中外且萬國已觀其始惟陛下慎守其終思鮮克之言戒性習之漸則天下幸甚上嘉之以本官直史館車駕北巡令知中官名表獻守都賦述國家受命建號之地宜建都立宗廟時雖未遑後卒從之會詔直史館各獻舊文以蒙叟所著爲嘉改職方郎中景德中以足疾拜太常少卿致仕卒年七十三所著有五運甲子編年歷三卷子宗弼宗誨皆進士及第

俱見宋史

宋程迥字可久家於沙隨靖康之亂徙紹興之餘姚年十五丁內外艱孤貧飄泊無以自振二十餘始知讀書時亂甫定西北士大夫多在錢塘迥得以考德問業焉登隆興元年進士第歷揚州泰興尉訓武郎楊大烈有田千頃死而妻女存俄有訟其妻非正室者官沒其貲且追十五年所入租部使者以誘迥迥曰大烈死貲產當歸其女女死當歸所生母可也調饒

## 甯陵縣志

卷之九 人物

四

州德興丞盜入縣民齊翊家平素所不快者胥絰逮獄州屬迥決禁囚辯其冤者縱遣之翊訟不已會獲盜甯國翊猶訟還所縱之人迥曰盜旣獲矣再令追捕或死於道路使其骨肉何依豈審冤之道哉唐肅宗時縣有程氏其父兄爲盜所殺因掠女去隱忍十餘年手刃盡誅其黨剗其肝心以祭其父兄迥取春秋復讐之義頌之曰大而得其正者也表之曰英孝程烈女民饑府檄有愬閉糴及糶與商賈者迥卽論報之曰力田之人細米每斗錢九十五文逼於賦稅是以出糶非上戶也縣境不出貨寶苟不與外人交易輸官之錢何由而得今強者羣聚脅持取錢毆傷人者甚衆民不敢入市坐致缺食申論再三見從乃已縣大水亡稻麥郡蠲租稅存簿迥白於府曰是驅民流徙耳賦不可得徒存欠籍乃悉蠲之郡僚猶曰渡江後來未嘗全放恐戶部不從迥乃論之唐人損七則租庸調俱免今損十矣夏稅役錢不免是猶用其二也不可謂寬議乃息境內有婦人傭

身紡績春簸以養其姑姑感婦孝每受食卽以手加額仰天而祝之其子爲人牧羊亦乾飯以餉祖母迺廉得之爲記其事白於郡郡給以錢粟調信州上饒縣歲納租數萬石舊法加倍又取斛面米迺力止絕之嘗曰令與吏服食者皆此邦之民膏血也曾不是思而橫斂虐民鬼神其無知乎州郡督索經總錢甚急迺曰斯錢古之除陌之類今其數乃三倍正賦民何以堪反復言之當路奉祠寓居番陽之蕭寺程祥者從伯父待制昌禹來居番陽昌禹死遂失所依祥繼亡祥妻度氏猶質賣奩具以撫育幼子久之罄竭瀕死隣家皆莫識其面有欲醮之者度曰吾兒幼若事他人使母不得撫子豈不負良人乎終辭焉或爲迺言其事迺走告於郡守月給之錢粟迺居官臨之以莊政寬而明令簡而信綏強撫弱導以恩義積年讐訟一語解去猾吏姦民皆以感激久而悛悔欺詐以格暇則賓禮賢士從容盡歡其子弟之秀者與之均禮爲之陳說詩書質疑問難者不問蚤

## 甯陵縣志

卷之九 人物

五

暮勢位不得以交私祠廟非祀典不謁隱德潛善無問幽明皆表而出之以厲風俗或周其窮阨俾全節行聽決獄訟期於明允凡上所未悉者必再三抗辯不少阿奉貴溪民僞作吳漸名誣愬縣令石邦彥迺言匿名書不當受轉運使不謂然遂興大獄坐死者十有四人及聞省寺訖報如迺言迺嘗授經學於崑山王葆嘉禾聞人茂德嚴陵喻樗所著有玉泉講學古易考古易章句古占法易傳外編春秋傳顯微例目論語傳孟子章句文史評經史說諸論辯太元補贊戶口田制貢賦書乾道賑濟錄醫經正本

書條具乾道新書度量權三器圖義四聲韻淳熙雜志南齊小集卒於官朝奉郎朱熹以書告迺子絢曰敬惟先德博聞至行追配古人釋經訂史開悟後學當世之務又所通該非獨章句之儒而已曾不得一試而奄棄盛時此有志之士所爲悼歎咨嗟而不能已者然著書滿家足以傳世是亦足以不朽子絢孫仲熊亦有名

見宋史

范仲淹本蘇州人少孤母適長山朱氏公隨就育及長讀書應天因家計於甯陵其異父兄弟朱某者多在甯陵後公貴以其田贍之故與朱氏書每言及焉且幼固以朱爲氏也年二十九遷文林郎權集慶軍節度推官始復范姓

明喬恕字希仁號萬竹以詩經中式宏治庚戌科進士授山西平陸縣知縣調南直婺源縣知縣陞監察御史壽甯侯家奴犯罪人莫敢問恕訊之直抵於法時閹宦劉瑾專權恕疏劾調謫邳州判官瑾敗尋起用補湖廣布政司參議歷官太僕寺卿卒於家其居官錚錚概如此

呂坤字叔簡號新吾嘉議大夫刑部左侍郎先世雒陽人始祖維來公當太祖師次維有軍功御札誤書姓李徙甯因之坤乃六世孫六歲從里師學讀論語首篇問六信字同異入梵宇客有索對者曰泥土地坤應聲曰

## 甯陵縣志

卷之九 人物

六

鐵金剛自幼穎異類如此年十二就試邑侯疑其文不出已覆試以放告二字爲題坤破云君子欲無訟故先聽訟焉邑侯奇之坤嘗自言讀書務明大意不必尋章摘句泥訓詁家言年十五讀史讀性理諸書欣然有會作夜氣鈔招良心詩年二十舉茂才第一每試輒冠軍食餼嘉靖辛酉以詩經舉鄉試第三名隆慶辛未年前期當會試時母病臥床坤日夜侍側衣不解帶嘗藥嘗糞憂勤畢集一日母謂坤曰昔當會試汝父卒誤汝一次今我病自忖無事汝速行坤陽應行隱別處料理湯藥母忽聞坤聲大怒不食召坤責曰何欺我坤泣跪告母曰功名事小母病未痊兒焉忍去母撫坤背慰曰我欲見汝成進士死且瞑目汝行勿負我望母更日加餐不得已辭母行時已正月廿六日矣卽日就道疾趨於二月初五日到京場畢卽於十六日束裝於廿七日抵家而母已亡計先後場屋往還僅三十日坤非急功名而後母者可概見也捷至坤撫棺長號曰進士何物人

以唾手得而我以母死換乎號泣而絕粒者七晝夜居喪骨立人罕見面萬歷甲戌對策同進士授山西襄垣令明年乙亥調大同襄垣劇治尙嚴明大同貧治尙撫字大概惟主於培植柔良裁抑豪橫去襄之日大雪繽紛士子衣冠走泥淖中途行三五十里有麾之不返者又有再越宿復送者百姓頂香攀轅羅拜繪像以進者婦女叩門內號哭失聲者小兒匍匐道旁叩頭不已者僚儕祖餞樂人奏樂流泣哽咽伏仰不能成曲者嗟嗟民愚而神豈無故而云然哉先是襄垣土豪某被坤大創幾斃後數日追至南關驛坤疑有它豪曰某向不知有法蒙明公創誨因知悔悟今而後不復犯死法矣公實生我何憚遠將其恩信入人之深如此知大同有隣邑山陰大紳王家屏姊夫王某者犯人命坐抵家屏以大宗伯居憂服闋赴京應補冢宰過大同向坤言王某事坤答曰獄已成不可反冢屏任吏部卽向僚友曰天下第一不受囑託者無如大同令矣特疏薦坤戊寅陞

## 甯陵縣志

卷之九 人物

七

吏部主事誥贈父得勝同已職建坊奏復原姓呂報可故事新曹尙卑伏緘默坤獨崢嶸在部十年七轉郎署官長每優容之未嘗爲罪舊例一省無兩吏部同邑黃某先補銓曹值年例外轉時有藉以嫉坤者朝議欲劾行嫉之人某坤代爲伸辯行嫉者大慚懼暮夜走謝是年戊子陞山東參政履任日卽飭風憲崇文教恤孤寡伸武備禁邪黨各處立社學以端蒙養創冬生院以恤殘疾實心實政齊東大治境內泰山乃海內香火走集奸民僞爲山神搜盤及捏報應諸醜狀惑衆懾詐人財物坤發覺其假狂妄頓息山有險峰峻嶺愚民名爲試心石捨身臺多致殞命坤盡杜絕之又開鑿新盤以分往還全活者衆任二年己丑陞山西按察使任二年辛卯陞陝西右布政任半年壬辰陞巡撫山西右僉都御史任一年半宦遊秦晉五六年間正己率屬身體力行不受餽遺不取贖羨不妄薦以官不枉劾以職官吏肅清興文飭武民安物阜邊境晏如尤諄諄留心於蒙養

教化孤寡無依之民所著有實政錄仕宦資爲模楷知天下將脊脊多事每嚴邊防嘗親蒞巡查回之日有郡藩某來謁者曰老先生終日防賊不知賊在那裏坤答曰使殿下必欲見賊今日不得在此坐某忙然無以對異日晉藩使長史謝罪戒來謁者其在晉也愛士民如子弟視貪官如仇讐所刻有風憲約民務各款言言見諸施行三晉熙然稱治迨三十年如一日迄今有成法不廢者萬歷癸巳陞協理院事左僉都御史明年甲午陞刑部右侍郎尋轉左在京四年與董范之議朝鮮之議石門之議堅守一說屹屹不爲動啣之者中以奇禍舉朝爲危坤一稟天日不懲始念給諫戴士衡疏論給諫劉道亨救之坤不辯引疾乞休疏凡五上不加譴責許致仕歸家居杜門謝客惟遇通邑大事輒身先不爲衆論所奪如修城力主其議見城池志如地畝錢糧差徭多所調停見賦役志雖曰懷社稷蒼生之憂滿朝推戴但不肯枉道求合有客自京師來者爲要津某致書

## 甯陵縣志

卷之九 人物

八

云葉臺山相公嘗於上前屢薦當致謝坤回書云宰相爲國薦賢公也非私也若作字致謝是以謝爲求矣百吹噓一言不謝乃所以成宰相爲國之心不然宰相之門豈少感謝之書哉其孤介峭直類如此又一日有中貴某乃上寵幸者差官賚書併束帛朱提來不知所求闖者以白坤曰大臣交結內侍律有明禁况素未識面不便應答原函璧回其守正不阿又如此家居二十年自奉嘗約門無長衣不置生人產不改造門第阿堵玩好一切屏絕山人術士足跡不到惟日與遠近門弟子講論身心性命之旨以體認爲工夫以修齊爲事業以繼往開來爲己任千里負笈來學咸稱爲沙隨夫子奉先人天理二字於膺堂置懷德懷刑屏省心記身箴參前倚衡吟天我篇理欲生長圖衰盛循環圖交泰韻陰符經註小兒語無如宗約歌閨範家禮疑家禮翼奏疏去僞齋文集諸書行於世年八十三歲卒於家撫按疏報奉旨誥贈刑部尚書諭祭一壇諭葬於縣西北離城

十二里之鞋城村見陵墓志臨終作反輓歌自饒自譏誌銘見藝文志子知思例廕入監官至南京戶部郎中見恩典志萬歷四十八年入祀鄉賢國朝順治七年 勅建專祠道光六年從祀文廟西廡

苗文英號樂菴與呂司寇同領嘉靖辛酉科鄉試因母病失明不忍少離定省遂矢志不仕家居歲一履公庭拜祝而已不以事干邑侯也呂司寇講身心性命之學每從樂菴有所領會故遂借去僞二字以名其齋後萬歷年間御史旌其門曰靖節高風誠不誣云

王印字世昌號裕武萬歷戊子科以春秋中解元登己丑進士選翰林院庶吉士歷陞刑科都給事中因浙江巡按彭應參與豪紳董范有隙被逮印抗疏救之其略曰竊惟國家故事凡不道不法重大急緊事務間差官校拏解以彰不測之威其餘不過付所司擬議而已臣等參詳吳氏之兩疏兼訪浙中之公論而嘆服我后明見也但事必覈實然後可以定罪法

## 甯陵縣志

卷之九 人物

九

必持平然後可以服人查據二臣所犯事蹟俱在彼中若不行勘法司無據以議罪二臣有死而不服况按臣奉簡書以代天子者省方厥任匪輕所關甚大在按臣固不宜倚勢以作威在明主當假權以行法就使彭應參有罪皇上俟勘明而加責可也卽不然褫其職以候勘亦可也遽以部民之單詞而繫之纍纍道途使遠方士庶共相指目曰此天子所使持斧衣繡臨制我者而一旦亦可以爲徒隸也毋乃不足以明威重而非朝廷直吏彈壓一方之意乎疏入神宗震怒謫亳州判官六科十三道疏救革職爲民萬歷丁巳卒於家年五十八歲太昌元年子無逸拔貢生赴闕請卹誥贈太僕寺少卿中憲大夫天啟癸亥入祀鄉賢

喬進璠字瑟如號鳴墀登萬歷癸卯賢書甲辰成進士授刑部貴州清吏司主事有林恭疑獄累年不決進璠片言折服釋罪誤多人羣犯感泣執金吾李恃勢殺人同曹皆愛聲援莫肯窮詰進璠繩以法卒如三章之約

奉差關西解帑金有羨餘百金有奇不取終封貯而還出守安慶起彫劫鋤豪強清馬政禁漁利正士習爲國儲賢而劉若宰陳九一等皆在培渥中留皖四載皖人德而祀之報最遷陝西按察司副使整飭漢差兵備兼撫民屯分巡關南道事務靖土寇高尚千等獻俘延安而漢中以甯申循吏李良棟之誣阻惡宦李喬岱之計雪廉令左立功之冤政績炳如陞四川參政未任致仕歸里先是進璠之在秋曹也名震京師有中貴王炫養者雅慕之欲與交進璠謝之不爲通在安慶有貴宦之弟魚肉平民事敗請託百出求寬狎狴輸金自贖終弗許其秉公守法不阿權貴大率類此家居二十餘年屢薦不起日從新吾先生講學間入關請益於少虛馮先生其行誼學問的有淵源篤貧宗各給田里周親黨不吝粟帛歲輸二千石糲粥待饑衣五百納裝綿濟寒以爲常不惟甯人啣恩豎碑而商考兩邑亦頌德鐫石曰德冠中州惜夫生平著述俱遭兵燹僅餘理學略言淑

## 甯陵縣志

卷之九 人物

十

身八則淑世八則藏於家

國朝呂愼多字減之號蓮舟大司寇新吾先生之孫戶部郎中知思之子也性淳謹躬孝弟嘗以德行著稱鬢序間庚午薦賢書丙戌成進士筮任湖廣德安府推官祥刑明允僚屬肅憚戊子分校省闈得曹本榮等五人皆一時名士人服其鑒直指聶山右人也以私憾中傷一縣尹授指於多多不應出語人曰殺人以媚人吾不爲也因此啣恨遂掛彈章及事白乃陞刑部浙江司主政繼陟江南司員外郎聽斷一秉至公有張釋之于定國之風焉大司寇每倚重之三載秋曹歸來爰賦優游宇下者二十餘年郡邑薦賓筵者二十有二鍵關嗜古手不停卷生平著述頗富未付劊劂至恤孤拯難義施捐金猶細事也里人德之爲製萬人屏頌焉年八十無疾終里人慕義感德迄今猶稱道不置云

呂眞知字思男號裔陽大司寇新吾公之從姪孫也幼負大志儻不羣

年甫冠補邑庠博士弟子員屢試棘闈弗售僅以歲薦終識者惜之初任寶豐訓導繼陞郟城教諭再陞汝甯府教授三任秉鐸崇經術嚴考課躬行表率士習爲之不變有胡瑗分齋治事之風焉迄今崇祀名宦皆有實迹可據云及致仕歸里當崇禎壬午春闖寇犯城人皆逃竄知同本縣儒學訓導岳民庇糾衆修陴束牲洒酒共誓曰城存與存城亡與亡雖時勢已迫猶死守如初力不能支城破被執抵死不屈賊嘉其義釋之眞知志不苟免泣拜於先祠投繯自盡順治十二年奉 部咨查節孝闔邑士民公舉 三院詳批候題十六年 撫院賈給扁旌揚額曰忠孝全節康熙四年學憲張采訪節義士民復具詞公舉五年批准崇祀鄉賢 王應登字盈寰由歲貢授商水縣訓導值寇至誓衆守城城陷力竭巷戰身死闔學呈允康熙五年崇祀鄉賢

翟三策字獻明世居甯陵之西北邏崗集生平廉隅自飭言動不苟不但

## 甯陵縣志

卷之九 人物

十一

足跡不履公庭亦交遊罕至城市閉戶讀書汲引後學舉業一本純正不肯苟逢時趨故屢試場屋輒以平易見擯僅以增廣終不易志也崇禎末年土寇蜂起避亂城中時寇勢猖獗所在城陷其及門力勸出奔策堅不從止許與一子偕往城破之日慷慨悲歎遂投文廟內井中死之署事考城知縣楊起元扁其門曰正氣凜然又聯云取義在宮牆生則從君死則從師大節千百年凜凜殺身爲名教忠聞於朝聲聞於野徽稱億萬載轟轟

盧宗泰幼攻舉子業聞呂新吾先生講學慨然有求道之志北面執贄棄制藝潛心於六經持躬方正不阿壬午流寇袁時中寇甯宗泰先城守破垣毀壁輸磚萬餘於城以禦寇又出倉粟數十石以鼓義勇邑得以無虞後李自成入豫所在不守人見其猖獗有諷以去者則正色曉以大義及漸逼甯陵震動空城而逃宗泰率一老僕登陴有期城守見城中杳無人

跡回家仰天長歎入寢拜先人主拜畢卽欲自盡老僕泣守不去因不死賊亦不卽至不得已抱主走南村賊奄至毆之尋糧不應以白刃相逼大叱之賊怒縛於樹罵不絕口立射殺之識者皆言此老倔強到底一若猶有恨焉嗚呼宗泰於傾覆流離之際毅然不屈以常山之舌禦橫暴之寇言之凜凜有生氣抑何烈也亦可以知所學矣順治十二年蒙 三院會題祀鄉賢

劉景世字世之呂司寇門人劉言謹仲子也寡言笑潔修自好壬午城陷奉母張氏避難箭幹村賊至不肯棄母去四月初九日遂遇害無嗣止一女適邑庠郭扞亦早亡於康熙五年間闔學公舉督學道張 詳請批准入鄉賢

符希孟字泰岩秉性忠直於流寇犯甯之日奮不顧身罵賊而殞後邑令葉懋楠查實請允康熙五年題祀鄉賢

## 甯陵縣志

卷之九 人物

十二

李學恕字推已歲貢李文蘭之子性至孝尚氣節常讀史至顏常山罵安祿輒拍案曰此真鐵中錚錚人中佼佼者乎方爲不負所學生平志意類如此萬歷間呂司寇修邑城奉文以儒官給冠帶捐資助餉勤力重修崇禎十五年三月內流寇東犯城陷恕矢志效死罵賊不屈遂遇害於順治年間闔學具呈蒙 三院會題下有司旌其門曰節昭白屋行題學道准祀鄉賢

曹有謨因流寇破城心懷忠義抗志不屈仰天長號北向稽首投井身死妻張氏見夫亡誓不獨生亦投井而死

王無逸字敬子號耐園太僕公長子也爲人剛方嚴峻雖燕闔私處正襟危坐凝然終日崇禎丁丑由拔貢筮仕白水立明德書院課士講學人文蔚起更脫私囊買牛闢荒大修城陴門樓巍然雲表吏畏民悅一邑大治時值庚辰關中赤地千里黃龍山小醜弄兵夜半潛入城陷無逸猶公服

坐堂上賊跪而稽首曉以大義責令解散不從因呵罵之曰明明天子號令不遠將寸磔汝且赤汝族甯不畏法竟激烈冒刃死無逸死之前一月天子廉其治狀已遷杭州郡司馬時道路梗塞命未達而已罹異變白水士民追思不已申請督撫俎豆名宦其節概忠烈詳載白水志

范廷議字明著宏治甲子以詩經中式授刑部司務陞刑部員外郎後遷四川夔州府知府未之任其友呂涇野先生自滁還道過甯陵寓廷議家獨久時甯邑河患潰決涇野見廷議率士民具呈兩院爲一邑萬姓請命極陳河水爲害言甚悽慘心竊義之及相別登舟廷議亦將之官請一言以爲治夔之要涇野執其手曰夔州行領十餘縣願愛之亦如甯陵爾廷議頓首謝曰不敢忘也子輿氏云觀近臣以其所爲主例斯以觀雖其子孫式微無從讀其家乘碑銘與夫語言行事之詳盡識其芳躅可卜爲有道君子矣事見涇野先生語錄涇野諱柟關西理學名賢明志載范公畫

## 甯陵縣志

卷之九 人物

十三

省分謨坊在西街今無跡可考

丁獻圖字懷雲生而穎異軼倫年十五卽補邑庠弟子員十八領嘉靖己酉鄉薦庚戌成進士授兵部主事留心樞務凡邊塞險阨將卒勇怯皆熟知之大司馬倚重焉轉刑部員外尋陞郎中凡論斷囚獄務期平允當時槐庭柏府嘖嘖稱其明決朝廷廉其才備兵陝西時西陲用兵乃蒐士卒立保伍申法令剿巨寇而境以大甯值分宜柄國素啣之將謀中傷遂掛冠歸日與二三同志染翰賦詩徜徉林壑間意泊如也且輕財貨歲侵里中待以舉火者數百家尤篤於族人婚姻喪祭必周焉嗣是相嵩父子益橫傾朝中正人無虛日及貴溪容城咸枉死西市因而憤極繕疏往論之仗劍渡河朔北風旅館長夜淒涼染病遂不起家人扶輿抵家而卒一腔忠憤未獲展舒君子不能無遺憾焉

郭佳印字如仲號夔一先世東明人明初徙甯陵爲人和易有容不修苛

節與人無少長悉款洽及大節所關又侃侃特立不肯隨時變易弱冠能文章有聲鬢序間以特恩膺里選後庚午與從父浩同登賢書丁丑成進士筮仕深州刺史因忤中貴落職久之補潤城幕僚旋攝無錫篆不苛不縱人皆畏威而懷德銓部擢知睢甯將赴任錫之百姓方倚以爲命羣集河干奪輿而歸竟赴闕泣留遂不得去未幾改授無爲軍百姓攀轅號泣之狀一如赴睢甯時會督撫亦上章言吳民洽其治朝廷如其請遂實授無錫令錫之漕白糧久爲吏胥所侵尅以致前任數令皆因是謫官察其弊悉置之法人人稱快治錫僅一年善政不可枚舉後陞兵部職方司主事時風鶴告警錫民愈不願其去詣京泣留命以部銜理邑務不數月轉常州郡守乃以理邑者理郡郡又稱治後大兵南渡江淮悉歸版圖遂掛冠歸歸而日侍封公側不出戶庭者六載迨封公捐館舍哀毀骨立過痛致疾遂以此終焉

## 甯陵縣志

卷之九 人物

十四

國朝李長恂字湛源順治三年以明經貢於鄉賦性孝友天懷亢爽正身率物行無詭隨至於經傳子史博洽淹貫文名藉藉一時順治八年除授彰德府林縣訓導十一年陞南陽府葉縣教諭康熙四年裁缺至九年補汝甯府上蔡縣教諭三蒞鱸堂有林彙課士錄龍臺倡和大社瑤函諸集人咸推多士楷模年老乞休歸里兩沐鄉飲正賓閉戶授徒不預外事壽七十九卒於家南陽司理薦云堪爲士型足作民牧分守汝南道薦云立教有方士林觀感淡薄自守風俗丕變立身居官之概如此

張禹謨字緒禹號衷亮通經術識大義爲諸生時已爲邑中所倚重乙酉以書經舉於鄉己丑成進士觀政歸卽舉司寇呂公良法陳於令招募十排除簽點陋規條陳驛站革養馬諸弊政闔邑稱便庚寅授米脂令衆皆難之以米脂爲逆闖巢穴且近邊陲荒僻難理禹謨笑曰不遇盤根錯節不足以別利器况爲我三世祖崑公宦遊地也遂命駕西行人其境荆榛

塞路狐兔穴城民籍不滿百戶禹謨設法贍濟招集流亡綏定殘黎戴星出入不憚勞動踰歲荒僻小邑竟成熙穰樂土三載報最孟撫軍薦疏悉其政績實錄疏曰此一官者潔己愛民流移悉復故土立社課士儒生頓有起色息訟而囹圄一空催科而撫字倍勤肅清衙役禁革行戶設貸贍貧城野免饑饉之悲多方安驛皇華無斷絕之患轉輸充裕軍需開墾尤善招徠疏入遷鞏昌府興屯同知及去米脂邑人皆焚香遠送哽咽不能語禹謨慰諭之去至鞏甫下車卽條陳屯事六宜曰招地主安流民清軍餘定賦式收人望獎賢吏屯道郭深嘉納之著爲令不意二日忽病三日疾革鞏守親臨檢視旁守一僕行笥中止有銀兩餘錢五百敝衣數襲而已撫道嘉其清苦准給勘合乘傳搬櫬歸里噫若禹謨者出處皆有實政誠無媿鄉之賢者矣

王培字益仲又號黃干黃干者公初爲汴東人志始生也公代有隱德會

## 甯陵縣志

卷之九 人物

十五

世亂屢播遷而至宋之甯陵是爲甯人公生八歲而孤其在甯也實依母張太孺人太孺人命從塾師翟先生學甫一歲熟四子書五經凡八週偶病臥同舍生所誦書皆默識弗遺諸子史百家目下輒數行曉大義爲文卽效之始學八比卽洋洋河漢翟先生奇之然弗能量之也楊生者予老友也嘗爲予言見其就塾時日讀書八種蓋天授矣故時號爲神童未幾翟先生南歸公復從至柘先生歿公無依育于張氏遂以張姓補柘博士弟子員試輒冠士文洸濟奇恣老生耆儒咸咋舌不知公之隨地湧珠璣也羅嶽瞻侍御賞其文至許以金華殿中客丙戌中本省鄉試副車戊子旋登賢書公之南也是時太孺人猶在甯世益亂寇交訐靡爲通比歸省而太孺人已歿公呼天嘔血眊不知人遂邁疾會有某翁者授奇方得瘥人謂神憫其孝也登賢書後益肆力經史凡天人性命之微古今得失之變人材賢否之林以及天文律歷詩賦籀篆與

本朝典則書契無不精研析疑抉奧如所著史誤諸書闡前古未發不徒強記也然公性尤忠孝好讀離騷經孝經每于君親之故可喜可愕者輒低徊慨息不已憶在城東隅與共晨夕風雨燠寒或毗裂髮指或歌哭長嘯旁引一樽讀讀竟還飲潦倒參橫斗移之際以爲恆人或訝爲狂惟予知其天性勃鬱激發有如是也兩上春官不第一日泫然曰吾奈何泯沒吾親乎趨至都詣宗伯請復姓補制宗伯曰嘻例也然未有補制者嘻孝哉奏入得請因署牘曰孝思篤摯不愧孝廉以風倫常云服闋入闈爲清漢十四藝夙所學也言官劾其違例

世祖章皇帝 召試大奇之會且大用格于部議而止然公之才之氣固卓絕矣公純孝絕人曩者太孺人殯甯時時多故未及成禮至是得

旨改葬泣血哀毀如曩時禮儀孔都會葬者車數百乘皆嘆息涕下去公前育于張至是張君已逝公卹其子及家久而靡斃所謂翟先生者歿久矣公

## 甯陵縣志

卷之九 人物

十六

爲經理田宅其子老而無子公爲娶妾生二子姊夫吳君來歸公分田授宅逮其子若孫皆公錫類也公慷慨負氣節敦然諾遇事風生目炯炯如曙星有不平或值人急難輒雷迅風颺馳赴之所謂始若落落難合後事竟成者然明白剗易人有寸長卽虛懷獎掖之如弗及與之遊嗒焉失又油油然自得也讀書不事章句饒經濟知經權凡古今諸大事設身籌畫出其特識往往在史冊所傳之上而要皆能引經合道知所挾持素矣往者假旋里居嘗與予質衛君待子爲政一章究折衷于王文成公之議其心力類如是邑有利弊請諸邑令如禦寇之方濬渠之利皆排衆議獨任之卒底于成又性剛正不與時俛仰旣連不得志于禮闈就國學教習訓兩旗子弟故事教習者恆爲生徒所媒侮或有問難不能應輒詆嗤之公嚴師範有問卽響答日入學舍說書數百條亶亶無滯義人人懽服有不率教者夏楚之無間言旗制每生百人教習五之至是百人者皆質疑析

異于公欣欣意得無虛晷矣嗣以孝廉揀選授直隸新河縣令公捧檄曰是在行所學耳奚甲第庸也抵新見前罹邪教之變城陷廬焚民瘠而悍曰是不可法繩也在端本以化之首註孝經頒行立義學百二十餘所學者千餘人躬董課之評隲其所爲文琅琅絃誦聲相接連翩兩闡聞新邑不登科者三十年不登第者百餘年所矣至是始颺起又取司寇呂公所著小兒語宗約歌閨誡好人歌爲四小書令民愚不諳文者及童丏熟之以易曉也不期年禮讓皞皞然往予過新郊見豐碑奕鳳則所紀載學田及塾師籍數又皆公悉心經理泐諸永遠者也其文翁蜀江之化乎催科不聞敲朴輸納者皆于廳事無錙銖羨饒有則返之吏白曰例也公叱曰剝民耳亦有例乎吏懾而退自輸名紀數而外印票箕斂之弊一絕聽訟畫木爲人使就鞠村落嬉嬉聞雞犬聲不見胥隸也折獄片言卽上檄亦必三日報民朝入城夕返舍不裹一糧攜一錢公旣苞苴不行請託不預

## 甯陵縣志

卷之九 人物

十七

借資緣爲姦飲食漁利者無容足矣鄰邑質成者咸樂就新以故新訟少而聽斷他郡邑者獨多然公用法平恕不阿上官意識成上官或時不憚久而喜曰賢哉新令是也卒相與懽然無間至屢檄獎借之其秉正無回又如此各村舍設義倉二十餘所歷年積穀六千餘石皆公倡勸之非以例輸將者也推新陳謹閉藏慎筭鑄可十年凶禔無患又民有小過令輸野蔬瓜芋之屬以代笞人或訝爲猥瑣至歲饑取以佐穀民旣賴以全活而歲省穀數百十斛然後服公之仁人遠算爲不可及歲大水漳滏間波瀾淼然公率衆塞之會某村水先至田廬蕩然災矣雅不欲爲人代瘡苦也公亟斥笞之塞益力災者懟比水平復其租賑之穀災者輒又大喜而南甯之北處下流者萬餘人咸匍匐公堂稽首曰微公吾其魚矣相率裂帛懸木于公署而去雲旗飄搖過者爲嘉嘆云先是新邑有剽竊者胥篋探囊漸成赤丸公釐保甲嚴巡緝密爲籍以識夜出不歸者按而治之曰

爾何往爾卽不盜而棄田廬而遊手罪也咎之人倣其神而無捕治之勞新邑城郭官廨半圯吏請治之意以營私也公曰諾城以衛吾民也倉庫以積貯也先之學宮前聖賢所依庇以作人也神祠佑吾民也亦先之弁兵治盜也養濟恤斃獨也次之至吾舍不風雨足矣毋亟然往者公行郊坰見隙地蔓生蒿荆曰勿剪拜迨民有應咎者賞之使刈薪山邱以給陶者易其罇埴又罰有過者役三日二日有差又不卽役之也籍而記之得役千百日民臆之曰公其欲供炊爨築室苑乎不以煩吾民也善矣至是百度並新陶者供陶役者供役不數月魏如奐如而民未損一錢一粟一粒由斯術也可以裕國帑可以治軍旅矣境有瞽者公見而惻然曰與爲丐毋甯有所用之也註

上諭十六則而弦歌之參以呂新吾先生小兒語爲律韻若度曲然月給瞽者以粟令肄習習旣成鏗鏘有節奏徧弦歌于村墟阡陌之間童耆婦子聽之咸感悅而矇瞍者以月得粟也業益工而歌益勤久之學士大夫亦相與兢聽之而霽霽涕勃勃然感且興其桀不馴者交愧悔詣公求改過公以其維新也復題其門以旌之風勵捷于道人民貧無以婚葬者周之俾各遂體

朝廷行王政也然公爲治雖備舉尤重文章好古嗜奇新河布衣宋鵝池先生者明嘉隆間才子也晚老于江陵之鵝池因號鵝池蓋鵝池之湮沒久矣公嘉其遺集亟梓之豎片石于故里酌之以文文旣燔有翩翩飛而唳止于螭右者鴛鴦二也觀者訝嘆公再拜曰其先生之感數百年後有知己乎豢之署西顧安所得池耶因濬古井得水三尺而涓涓而湛湛以澄泓放鵝其上游斯泳斯若吟嘯若賡和酬畚公時把遺文對誦于月白風清之下儼然晤高士也海內異之詩歌成帙曰雙鵝集新河東郭有周彬故址彬元丞相脫脫幼子也丞相歿避居此公表其里巖冬俯碑上書字曰

嘆更裘雪霰增裘竟日無倦不啻歐陽之集古而北地風剛疾所由來矣  
公治新七年績最大中丞格文清公署上考曰以實心行實政大中丞于  
公亦署上考曰教養盡職嗚呼知公哉行取入都去之日截鐙留鞭者以  
萬計遮道不得行自晨迨漏三鼓才二十里耳提榼攜壺漿送者履錯公  
曰昔人去官人取一錢吾今人取一卮也于是輒共醉已而共泣送者復  
遮道左而東方已曙公曰無庸也公等且休吾亦從此趨王程矣衆稍稍  
揮涕去猶有歔噓太息於郭門里巷之外者因共刻碑肖公像爲祠歲時  
過者復低徊愴慕彌日不忍去至都

御試乾清門授戶部陝西清吏司主事旋遷本部山東清吏司員外郎公職鹽  
筴多所釐剔入署治事入邸讀書宴會車馬謁拜之繁落落弗與也同官  
服其才器大司農深倚重之期以大用而公疾作蓋積漸者舊矣遂請假  
歸歸里藥裹之餘猶日讀書爲詩歌慨焉有登泰岱之想欲轉假與予共

## 甯陵縣志

卷之九 人物

十九

遊乃閱四月而歿歿之日遠近知與不知聞公名者咸痛悼蓋公生平於  
仕進生產財貨之故泊然不屑顧獨嗜書自爲諸生以至服官凡燕間患  
難歡愉逆順造次冗囂與夫舟中輿上登山臨水之際一寓之於書日所  
掇拾蒐輯片語隻句屏楹几牖皆滿如左思十年作賦時每篝燈至雞鳴  
夜旦僮僕皆酣寢公朗吟益健卷不盡不止精力殫矣記寢疾里門時猶  
觀書如故諸子輩咸至孝懼勞公也爲匿書公愀然曰吾畢生爲學爲政  
立德立言皆得力於書若令而翁束書此心何處安著不但樂此不疲也  
於是索書彌亟子輩匿書亦彌亟至不得則跌坐冥思又與古人相晤對  
訂質矣未嘗一刻離載籍也且性穎慧凡所披閱歷數十年弗遺忘病亟  
不自讀猶抽架上帙令兒輩補葺訂較曰某卷某頁某行某字某年前吾  
所改定評註某墨書某丹書今如故否也天授哉天授哉然卒以是邁疾  
亡公著作宏富古文則綱目刊誤二十一史刊誤偶存集歷代善政記詩

賦則苦梁吟南遊草粵東吟西遊律今是園集句詩清源十景詩皆行於世獨慰交述集唐百餘首則欲以八千金爲其友營救而未遂者事尤磊落

論曰予嘗讀屈平離騷至於天問未嘗不訝其誕譎恣睢至於不可紀極既又悲夫凡人抑菀阨塞之致求之人而不得其故則求之天其情然也予爲問王君之天矣以才若彼以德與學若此此所謂賢豪間者耶以之秉鈞軸握顯要其豎立當何如者顧位僅爲郎年未登臺天平謂之何哉然如君者聲稱行事固已在日月之表矣厥子濟濟咸克負荷以較庸庸席厚莠忝焉無聞者久矣夫泥沙鴻羽視之矣是又未可輒量天也已又曰士貴敦倫紀才抑末也王君之於君親師友何如乎無它誠而已中庸言天道而要歸於誠又奚怪其施設之閎肆也顧才亦未易言矣如君之華而實奇而正高而下人大而細小不遺者幾人哉吾獨悲其阨於少

## 甯陵縣志

卷之九 人物

二十

抑於壯未盡展敷於老平生憂愁之言多而懽愉之致少也然王君卽不困能靳其才不發皇乎噫王君固才士有才如君亦可以繩天下之言才者矣

柘城李方廣撰

續修

胡一蛟字瑞麟號兆昇順治戊子拔雋甲午舉於鄉己亥成進士弈世儒門性孝友行端謹於世味泊如也最嗜濂洛關閩之學以實行勵子弟樂與善扶寒弱嘗思敦世風於古處爲文一規先正遊其門者皆根基理要不逐時趨奪標者前後輝映調停差役復衆擎易舉之法邑困以蘇令慶雲二載多善政大段見士民略一編以爲民除暴致鐫官去慶人皆設主祀之宦後仍授經於鄉排異衛正益力晚年陶情於詩音節和雅無抑鬱不平意更究心岐黃多所全活貧愈甚情愈恬未嘗以家計容心知交官近土者亦弗輕投一刺清操始終如一云著有太易題說啟蒙正業大題

稿學業正則慶雲士民略古歡齋詩集

攷公事實文章經濟卓有可觀所謂鄉之翹楚非耶

舊志紀於甲科意其時公猶存歟今躋於名賢謹錄原傳如右

呂崇謐字靜菴登乾隆壬戌進士授山西太谷縣知縣生而謹恂篤行孝友蒞官非宴會不御珍羞公服之外冬褐夏葛依然儒素立文社建書院捐貲課士時進諸生而授經事載太谷邑乘致仕歸增修家祠置祭田四十畝家居十餘年孜孜以講學爲事築關廂隙地爲書舍啟迪後進貧不給者資之多所成就如張玉堂等掇科應選二十餘人平生得力體認篤實年逾古稀手不釋卷著有四書存十六卷子彝樸拔貢生道光初年闔學公舉崇祀鄉賢

符兆熊字渭起豪邁雄偉志概不羣少習舉子業試輒不售棄而學孫武家言自多神悟乾隆戊子入貲爲川省郁山巡檢有能聲上官器之金川

## 甯陵縣志

卷之九 人物

二十一

兵起巴勒布犯順師出廓爾喀先後十有餘年籌辦糧儲綜理軍務屢著多功初擢榮縣知縣權忠州牧任打箭鑪同知陞順慶府知府調甯遠府到處利弊除興治績稱最五十八年荐授四川鹽茶道改遷川東兵備道逾年苗民不靖蜀楚黔三省騷動乾州失守督兵濟運軍威大振積勞嘔血卒於永綏戎幕事 聞照按察使從優議卹子永培蔭州同道光十年入四川名宦祠並崇祀原籍鄉賢

武勇

東漢典 韋形貌魁梧膂力過人有志節任俠襄邑劉氏與睢陽李永爲讐韋爲報之永故富春長備衛甚謹韋乘車載鷄酒僞爲候者門開懷匕首入殺永併殺其妻徐取車上刀戟步出永居近市一市盡駭追者數百莫敢近後屬夏侯惇數斬首有功拜司馬曹操奉詔倡義討呂布於濮陽布有別屯在濮陽西四十五里操夜襲比明破之未及還會布救兵至三面

掉戰時布身自搏戰自旦至日昧數千人皆重衣鎧棄楯但持長矛撩戰四面又急韋進當之賊弓弩亂發矢至如雨韋不視謂等人曰賊來十步乃白之等人曰十步矣又曰五步乃白等人懼疾言賊至矣韋手持十餘戟大呼起所抵無不應手倒者布衆退會日暮操乃引去拜爲都尉引置左右將親兵數百人常繞帳下韋旣壯武其所將皆選卒每戰鬪常先登陷陣遷爲校尉韋好持大雙戟與長戟刀等軍中爲之語曰帳下壯士有典君提一雙戟八十觔操征荊州至宛張繡迎降操甚悅延繡及其將帥置酒高會操行酒韋持大斧立後刃徑尺操所至之前韋輒舉斧目之竟酒繡及其將帥莫敢仰視後十餘日繡反襲操出戰不利輕騎引去韋戰於門中賊不得入兵遂散從他門並入時韋校尙有十餘人皆殊死戰無不一以當百賊前後至稍多韋以長戟左右擊之一又入輒十餘矛韋被數十創短兵接戰賊前搏之韋雙挾兩賊擊殺之餘賊不敢前韋復前突

## 甯陵縣志

卷之九 人物

二十二

賊殺數人創重發瞑目大罵而死賊乃敢前取其頭傳觀之覆軍就視其軀操退往舞陰聞韋死爲流涕募間取其喪親自臨哭之遣歸葬襄邑拜子滿爲郎中車駕引自近文帝卽王位以滿爲都尉賜爵關內侯見三國志

義烈

唐逸名唐至德三年冬十月尹子奇陷睢陽張巡以下俱被執士卒當子遺之餘莫不靡然降附時甯陵之從軍者二十一人見巡之不屈也皆相顧涕泣巡遇害二十一人死焉昔田橫之歸漢也可以死可以不死橫之死無謂矣彼五百人者皆自殺以殉君子曰田橫之客皆義士予其心也睢陽之難饑疲殘創切其身室家兒女搖其念彼巡之死臣道也宜也二十一人者孰迫之哉忠義之心殷於一感無所顧惜故耳嗚呼臣死君士卒死將皆義之大也天地民彝之眞也僞命諸臣甯不泚頰惜也名以微賤

不傳又不得與田橫之客類書史簡君子悲之

明吳之秀萬歷丁酉以詩經中式居邑東關唯知閉戶尚誦讀弗輟忽聞賊圍其宅正衣冠坐堂中賊入正色詰之曰國家何負汝汝輩作亂殺人乎賊欲脅之去叱曰我朝廷孝廉肯從汝反耶加以刃罵愈厲遂死之題贈宛平縣令

徐大成字斗冲幼習儒書志未遂終身爲義館師四方從游者甚衆親死廬墓三年壬午闖寇壓境罵賊不屈而死

雷雲龍字蘇門甯陵諸生也週歲而母亡鞠於叔祖母李氏少長父督之學爲文卽中程度而筆札爲尤工十七應童子試學使者得其卷異之曰此必士之有品者遂拔入庠自是文聲日懋四方從游者甚衆雲龍持身嚴重一衣十八年不渝其初色說書一本傳註不墜明末支遁荒謬惡習以故多士翕然宗之辨析疑義一言立剖雖不讀書識字者過其前無不

## 甯陵縣志

卷之九 人物

二十三

各厭其意而去性孝友事父母左右順養無違而於鞠已者報之極其厚諸弟皆秉雲龍學以有成人謂東京諸名士弗能過也壬午歸德城陷死於兵其隸人關化歸自賊中云賊獲雲龍時命之跪不屈強仆之輒起且罵賊遂加刃焉嗚呼其與世之遁避無所而卒不免者異矣

睢州田蘭芳記

續修

國朝

路建翰字捍蒼號雙賜與兄建屏從姪德貴同登雍正庚戌武進士初任涼州守備署游擊護總兵印有能聲奉委領兵駐哈密旋署高古鎮番諸營參將丁內艱歸兄建屏哭母一慟而絕建翰獨任大事能盡禮起復補涼標游擊調甯夏戊辰會兵勦大金川五月抵黨垣協攻康八達建翰冒矢石爲士卒先中重傷卒於軍事平論功一等

諭祭葬贈參將旌忠烈卹其家人都功臣館邑忠義祠以守備蔭其子見府志

李載歌字賡堂邑庠生蘇克己字勝非武庠生成豐三年粵匪陷甯縣令  
蔣傷寄南鄙官危民亂同史演龍張甫亭遵諭團練勦賊於史家集立斃  
十八人士寇初平捻匪蜂起轉戰而東載歌歿於包公廟克己歿於麻塚  
集後崇祀忠義演龍發奮資謀甫亭疊奉府憲王督辦團練祝勝帥毛帥  
札調進勦親冒矢石屢著戰功八年秋倡築砦堡同治己巳事平刊石演  
龍事見豫軍紀略

咸豐年寇變殉難

附

康體安字坦如咸豐三年送兵車至府城陷殉難請允入忠義祠

張基平字祥泰咸豐三年粵匪陷城殉難請允入忠義祠

梁果武庠生平樂砦長咸豐九年捻匪陷砦殉難請允入忠義祠

符燦芳字化荃咸豐九年捻匪陷砦殉難請允入忠義祠

趙明倫咸豐九年捻匪陷砦殉難請允入忠義祠

## 甯陵縣志

卷之九 人物

二十四

呂積純字子誠咸豐九年捻匪陷城殉難請允入忠義祠

呂直卿字勁節咸豐九年捻匪陷城殉難請允入忠義祠

秦心田字培齋把總銜弟心立字卓然外委銜心平字坦齋子合巽字子

風俱營兵咸豐九年捻匪攻城禦敵殉難均請允入忠義祠

杜金標字廣寅武庠生成豐十一年遇匪接仗被戕身死請允入忠義祠

李龍躍字騰淵咸豐八年被捻匪掠不屈死之請允從祀郡城忠親王祠

隱逸

明喬宏杞字楫航幼爲諸生厭制藝無益經濟遂入貲辟雍執經於呂新吾先生門牆肆志博覽於諸子百家無所不窺如天文律呂字學算法皆有著述更多巧思如小戎戰車璇璣玉衡胥能按圖制之凡周禮所載古制人有讀之不能解者則手畫其圖命工成器無不如法明季見兵戈漸起復精孫吳家言戰守樓櫓悉倡邑人備具甯南鄙有土賊段魁吾成囚餘黨百餘謀劫之夜半城中火起邑令已爲所執闔城惶惶錯愕宏杞曰勿懼賊巢在南接應多在南方賊必劫南門伏兵於此賊可擒也率壯丁廿餘人持利器伏於門內賊果劫南門生擒賊首段魁吾立斬之懸首於門復燒燭對弈以鎮之賊失其首果舍令墜城散去邑賴以安夙從杞縣劉文烈公遊公知之最悉欲薦於朝遣使偵之卽走京師謁文烈公而借箸焉見事不可爲及回籍爲鄉梓計而甯已失守因渡江至金陵聞北都陷

甯陵縣志

卷之九 人物

二十五

拔劍起舞血淚俱下誓不與李賊共戴天也謀詣史閣部畫守江計陳北征策兄宏楠屈之聞

國朝定鼎乃喜曰國仇旣誅從今可作方外散人矣遂放浪山水間作悲秋吟譜於琴朝夕鼓之以寄意焉

續修

王當世自號寒荷明諸生太僕卿印之曾孫鼎革隱居邑之南鄙杞邑馬頎善寫意嘗爲文社交當世遺素絹一幅頎躊躇經年爲畫淡墨枯林瘦竹題云不敢以夏木濃陰污君素壁其高尚信於友如此詩書娛志手不釋卷爲文浩瀚有氣概序訂先世舊集一時傳銘多資手筆著有茹蘗軒梅花書屋卯辰詩集共數十卷

郭扞字衛公明諸生鼎革有誓死魯連終蹈海避徵郭憲欲焚衣之句隱居南鄙桃溪喜談節義覽古得十餘人作贊酌以酒嘗北遊蘇門尋高士

孫公和嘯臺邵康節讀易處南陟九里山憑弔韓淮陰故壘涉瓜渡登金山望大江滄茫爲之流涕旣而返舊結隱地種花獨愛菊尤嗜黃白醞酒吟詩不與外人接讀書有特識詩近唐文仿司馬子長及韓柳八家矩度著有汎菊堂詩栢隱山房桃溪誌略香溼亭菊譚共八卷善書法與鉄里馬之驪爲詩友南村王當世爲文友自號 隱居士

義師

胡長庚字映垣邑增生家饒於貲性好施予嘗出已廩敦聘名儒集邑中才俊士從之受業其間尤貧窶者或資以衣食或助之婚喪人得一意向學所成就者甚衆其表表者如華景昌路史侯屏秦君韓輩皆馳聲藝苑而路之感其玉汝爲獨摯云

路史字直公郡增生居縣南張弓集授經家塾束脯之饋概卻不受四方負笈者雲集日爲之提命諄諄俾有成立而後已一時有河汾之目

甯陵縣志

卷之九 人物

二十六

田簣山先生論曰自先王養士之法廢而州術閭巷間子弟多至廢學斯二先生者或推所有餘以育才或本所自得以造士俾一邑之人彬彬有所興起所及雖狹其亦可以風矣

補遺

國朝呂前應字躬祇戶部主事呂紹栻之從姪也爲邑庠生繩趨矩步惟恐有媿司寇公家法見有親喪未舉者持其父勸孝格言親送其門人或厭其迂弗恤也戶部督餉於秦之蘭州不幸遇變母子俱亡三孤皆幼雙襯不能返故土前應獨引爲己憂至丙午戶部季子前庚舉孝廉前應方幸歸襯有日已而孝廉又死不禁揮涕曰戶部母子骸骨未返前庚旣死我已年近古稀今不爲之計使永爲異鄉之鬼我死何以瞑目遂典田園決意獨往妻孥緩其行不聽其族貴諱振令於山左義其事復助以貲遂策蹇西上山河間關往返不下七千餘里未及百日而雙襯已歸且移其住室

以妥靈經紀喪事俱令成禮族黨義聞於令令欲表厥宅里以樹風聲嚴却曰君子愛人以德何量我之薄也衆強行之令旌其門曰孝展西秦越一年而卒

庠生郭斌性耿介好義俠順治庚子辛丑歲邑被水患里甲借常平倉穀捌百餘石莫能償而推陳出新例應歲報收納雖升斗不容虧逋也斌憂官民交困不去諸懷適雛兒又危於痘疹竟不之恤取妻簪珥作路費奔籲

撫軍得免追併存倉積儲概行發賑藉以成全者不下千百餘人官民交甦厥功偉焉

